

# **EKALESIA FA'APOTOPOTOGA KERISIANO SAMOA**



**LOTU TALOSAGA TAUSAGA FOU 2024**

**ASO 01 IANUARI-07 IANUARI 2024**

## **FA'ATOMUAGA:**

E lē mafai ona nātia ua tupu le Ekalesia,ae o se lu'itau tele mo lenei tausaga.Ia toe silasila i le tupu o le ola faale-agaga o le Ekalesia Faapotopotoga Kerisiano Samoa.Ua iloa ma malosi i Samoa ma atunuu o le lalolagi,ae a lē tupu le ola fa'alē-agaga o ona tagata e faia fua lava,e leai se uiga,e leai fo'i sona tāua auā e lē o mea nā e faavae ai le ola ole E.F.K.S.

Fetalai Iesu: “A ole fesoasoani,o le Agaga Paia lea,e auina mai e le Tamā i lo'u igoa,o IA lava na te a'oa'o ia te outou i mea uma lava,e faamanatu mai fo'i o IA ia te outou i mea uma ua ou fai atu ai ia te outou”. Ioane 14:26.

Le mana lea e tupu moni ai le Ekalesia.O le mana e ola,e galue,e fa'asino,e faamalamalama,e faailoa,e a'oa'o,e a'oa'i ai le tagata E.F.K.S. i lona aiga,i lana aulotu ma lana Ekalesia.Ia pulea lelei o ta loto ona tupu mai ai lea ole amio.

Manuia le Tausaga Fou

**Paul Gray F.T.  
EFKS Glenroy  
Pulega Melepone Tutotonu  
Matagaluega VITORIA**

**ASO 1 IANUARI 2024. ASO GAFUA:**

**Tusi Faitau:Fa'aaliga 21:1-5**

**Matua:Fa'aaliga 21:5 "Ua fetalai mai foi LĒ e ti'eti'e i le nofoalii,Fa'auta,ou te faia ia FOU mea uma lava".**

**Autū: E faia i tatou e le Atua ia FOU.**

O le mau a le tusi o Failauga, e leai se mea e FOU i lalo o le lā. E manatu fo'i o se mau e telē lona taūa ma le sa'o o iai.O mea lava o le natura mai le amataga o loo tumau e oo mai i lenei lava aso. E o'o foi i mea ua faia i le poto o saienitisi i nei ona aso ua foliga ai e fou ae leai.O mea ua leva ona iai na faia e le Atua,a'o lea faato'a o'o iai le malamalama o le tagata.O leā tonu le mea e ta'u o le mea FOU?.Tali.O le mea ua faia e le Atua i le tagata,mō le tagata.O le Atua ua na'o IA na te faia mea FOU.O le upu, OU TE faia.Lona uiga,o IA lava E Ōu le foafoaga,o Lona silafia ua tu'u matāmaga ai le faiga e FOU ai.O nisi lava ala e ese mai i ala manuia fa'a Iesu e i'u vale.Pei o faiga fa'asiliaupule a Atamu ma Eva o le fia Atua,pei o le faiga lē usita'i a Saulo,pei o le faiga amio matagā a Tavita o le mulilua,faiga taupulepule a Iuta o le fa'alata.E anoanoa'i i le Tusi Paia le mau faiga sesē na i'u i le malaia.

O le afio mai o Iesu,na ia aumai le ala e sili atu nai lo ala masani.Auā e tusa lava pe FOU le tausaga,e tuai lava le tagata pe a tatou lē gaua'i i ala o Keriso tatou te FOU ai.O le Atua e fai mea mae'ae'a,Ou te faia ia FOU mea uma lava.O le tagata na faia e le Atua,o le tagata FOU atoa. O le naunautaga o le Atua o le fou atoatoa,'aua nei toe pisipisia i se mea tuai matagā,auā e fiu e fono e iloa lava.O le ala lea o lona finagalo,Ou te faia ia FOU mea uma lava.Le Ekalesia e,o le mana'o ua o'o e fialia ai le loto,ia avea i tatou ma tagata FOU i lenei tausaga FOU, pe'ā faafouina i tatou e Iesu.'Aua le fa'afoliga e FOU i isi taimi ae o loo tuai pea ile tele o taimi.'Aua le na'o na fonofono,ae matuā'i talepe le tagata tuai,ave le avanoa ia Iesu na te toe faia ai tatou ia FOU atoatoa.Ia manuia le malaga tatalo a le Ekalesia i lenei tausaga ua amatalia.

**Tatalo Faafetai:** Faafetai,faafetai le Atua.O Lou suafa e silisili lava lea.Na e faia mea uma o Lau foafoaga Paia ile lagi ma le lalolagi o loo tumau seia o'o ile gataaga.Faafetai ua matou aulia manuia le ulua'i aso o le tausaga fou 2024.O le ulua'i aso fo'i o le vaiaso talosaga mo le tasi o le au Kerisiano i le lalolagi, ma e ao lava ona tatou mafaufau loloto i galuega mamana a le Atua ile soifua ma le ola o Lana fanau faatuatua.Sa tautai 'Oe ile matou malaga umi o lenā tausaga ua mavae atu.O le amataga lenei o galuega fa'aauauina ile ola galulue o Lau Ekalesia aoao i ona tagata lolotu. Faafetai mo faai'uga lelei i lona itū faalē-Agaga ile tapenaina o fuifui lotu e fa'amanūina ai Lou alofa tele,e tāosoina ile filemū ma ta'ita'i folau ile manuia.

**Tatalo Fa'atoeseaga:** Lo matou Tamā e, o iā te 'Oe ala matou te ola ai. Fa'amagalo i matou ina ua lē galulue faatasi ma uso ile talalelei, ua faaogā sesē tofi ua oo ai ina leai se va fealoaloa'i, fa'amagalo le vā ma isi Ekalesia kerisiano i taimi e lē taugalemū ai ina ua tatou fia tauimasui. Lafoa'i agasala ile loto, agasala tuai, agasala tu'ugatā ma mea e le'o maua ai se nofo lelei. Ia faia mea fou mo lo matou ola. Ia taumamao i matou ma Lou to'asā mamafa tū a ia salamō ma fo'i atu ma le faamaoni. Faatoese ona o le tauaso pea o le silasila faale-agaga a le Ekalesia i galuega fa'aola a le Atua. Faatoese ona o le tatou lē talitonuina pea o fa'aaliga o le alofa faivavega o le Atua.

**Tatalo Manaoga:** Tatou tatalo i le Atua ina ia faatumulia i tatou e Lona Agaga ina ia faafouina i tatou i Ōna ala matagofie. O LĒ e mālīe ai o tatou mana'o o mea lelei, O LĒ fa'afouina lo tatou taule'ale'a fa'apei o le aeto. Tatalo i le Atua ina ia liligi mai ana fa'amanuiaga mo fuafuaga fa'ataotoo a le tagata lava ia mo lenei tausaga fou. Tatalo i le Atua, ina ia pa'i mai ona aao agalelei e fa'amāmāina ai le le tele o fe'au e feagai ma le Ekalesia i lenei tausaga fou. O Lau Afio ole totonugalemū iō matou aiga ete pulea o matou olaga faatasi ma fanau, ia matou maua le fetalitonia'i, maua e fanau le matata'u i Lau Afio, ma le āva i matua. Tatalo ia talitonuina e tagata faalogologo le UPU o loo a'oa'oina atu ia saga tupu atili le manatu tele ile Afioaga ale Alii. Ia faamafanafanaina atili ē lotoiti ma ē vaivai. Tatalo ia tupu tele le mana'o o tagata lotu e tatalo ma faatoga ma mafuta atu ia te Oe i aso uma e lē aunoa.

## **ASO 2 Ianuari 2024: ASO LUA**

**Tusi Faitau: Iopu 21:1-13**

**Matua: Iopu 21:7 "Se a le mea e ola mai ai o e amio leaga, ua o'o ina toeaina ma faateleina lava o latou oloa?"**

**Autū: Saili fautuaga i le finagalo o le Atua.**

E tutupu mea faigatā i nisi taimi ole olaga nei. E lē mautonu pe mafua i seā. Mafaufau i le aso 7 Oketopa 2023, na maliliu ai tagata Isaraelu e 1400, susunuina matua ma pepe, ona o le ita faamoemoe o tagata terorisi. Mafua aiseā? Faapena le fesili a Iopu ia Sofara, afai e sa'o lona manatu, e malaia tagata agasala, ae aiseā e ola umi ma tele a latou oloa. Aiseā e faateleina ai ma manuia a latou fanau? a'o latou ia fai mai la latou mau, Latou te le iloa se Atua? Latou te le fia auauna foi iai, e leai sona aogā mo i latou, Aiseā e manuia ai? O loo faaauau le tuufesili lenei a Iopu i le Atua. Ua ia fesiligia ai le Amiotonu a le Atua. Pe se mea amiotonu le sala o le tagata Faatuatua, ae lē sala le tagata agasala? Ona tali mai lea o le Atua "O ai lenei ua na faasesēina La'u Pule i manatu soona fai?" O le uiga o le fetalaiga a le Atua, o mea uma e tutupu i le olaga ma le lalolagi o le tagata, e afua mai i le finagalo tutasi ma le pule aoao a le Atua. E lē avea le lē fetau i le manatu o Iopu, ma mea e le fetau atu ai ma fuafuaga paia a le Atua mo lana tagata, ua uma ona faataatia mai le vavau, o lana Pule Aoao lea. O le autū lea o le tusi a Iopu, E tatala i le Pule Aoao toe faaiu i le Pule Aoao a le Atua. Lea foi e pei ona iai Iesu i le fa'atoaga i Ketesemane, O le a te'i lava tigaina fua Iesu i le satauro ona o le sala a isi? A'o le tali a Iesu, Lo'u Tamā e, aua le faia lo'u loto a'o lou finagalo. O le maliu o Iesu, na tali ai le fesili a Iopu. Se mea amiotonu le sala o le tagata faatuatua, ae le sala le tagata amio

leaga? IOE, ole amiotonu lenā faale-Atua. E oti le tagata amiotonu,ina ia amiotonu ai le tagata lē amiotonu.Le Ekalesia ale Atua,o le fatu tonu lea o le galuega o loo e gapatia ai.O oe lava e tigāina ina ia manuia le fanau a le Atua. Ae a faigatā tele ona tali lenei fesili i nisi o taimi,ona faalogo lea i le Alii toetu.Ia outou loto tetele ua ou manumalō i le lalolagi.Saili fautuaga i le finagalo o le Atua.

**Tatalo Faafetai:** Le Atua o le manumalō,Faafetai mo le malosi e faatino ai galuega lelei ina ia ola nisi tagata ile auaunaga,taleni eseese e fa'aolaola ai le tagata atoa ile tino,mafauafau ma le agaga.Fa'afetai mo auala faigofie i nei ona augā-tupulaga ua mafai ona fefa'asoa'a'i ai ini taimi vave.Emanuelu o le feau alofa ua fa'ailoa mai i Lau Tusi Paia.Faafetai mo le fesoota'iga vavalalata ile galuega ale Agaga Paia ole fesoasoani sili lava lea.O Lou Agaga Paia oloo faailoa mai mea e ao ona matou mitamita ai,ia tonu o matou loto.Fa'afetai ona o Iesu na maliu talu le tagata agasala.O Lou alofa e mai le lagi ina ia ola ai ma fa'asaoina ai o matou agaga.E ō atu ia te 'Oe o tagata uma e taufaivivi'i ile togiola tele na la saunia.

**Tatalo Faatoesega:** O Iesu ole Puluvauga ua tofia mai e le Atua le Tamā.Le Alii e,ua ia te 'Oe le viiga e faia ma le fa'alologo iai.Ia tatou iloa atili o Iesu lava ole malamalama o le lalolagi.Faamagalalo le ola fia viia ole tagata,ua tausili malō uma ole lalolagi e faoa Lau pule,ua tele pea taua ma fevaevaea'iga. Faatoesega ona e to'atele pea le 'au galulue e fa'a-ta'eta'ealuga ma maluelue gōfie ona o mea fai a le Ekalesia.Ave'ese le ola lē talitonu,lagona faa-lē tagata,lagona fa'a itūau ma le manatu faapito.Faamagalalo le au faigaluega galulue,ave'ese amio matagā oloo faia ile galulue ai ile galuega a le Atua.O le iai o Lau Afio e pulea ai o matou loto fatu,e maua ai le ola sa'oloto e maua atili ai le fiafia ma le fealofani e pei ona e finagalo iai.

**Tatalo Manaoga:** Tatalo se'i faamaligiina ifo i luga o Lau Ekalesia le Agaga ole tatalo i o matou olaga.Ia matou maua le malolosi ma le olioli e fetai'a'i ai ma faafitauli o loo fotua'i mai.O Lau Afio Iesu e tali mai io matou mafatiaga.Tatalo mo le Nu'u Paia o Isaraelu o loo osofa'ia e nuu tū tuaoi ona ole matau'a ma le ola tau pulepule leaga,ia vave se aso e to'amalie ma maua le filemū.Tatalo ia fa'aavanoa pea o tatou loto vaogatā e afio tumau ai le Alii.Ia auauna e faia ana feau lelei ma ia tatou aogā mo IA.E te fia silasila i mea saunia lelei ma le matagofie,e Viia Oe pea fua tele mai ina ua faalogo ua savavali Lau fanau i le Upu moni.Ia leoleoina o matou loto auā e tupu mai ai le amio,ole amio e faia ai le mea sili mo Lau Afio.

### **ASO 3 IANUARI 2024: ASO LULU**

**Tusi Paia: Isaia 55:6-9; Ioane 3:16-21**

**Matua:Ioane 3:16 "Auā ua faapea lava ona alofa mai o le Atua i le lalolagi,ua IA aumai ai lona atalii e toatasi,ina ia le fano se tasi e faatuatua ia te la ,a ia maua e ia le ola e faavavau"**

**Autū: Faatuatua i le alofa o le Atua**

O le malosi o le Atua ua lē faatusaina i se paoa uaea molī eletise afai e faapipii ma ki ona ola lea ma malama atoa.O le malosi o le Atua,o le malosi e atoatoa na'o IA lava.O le poto ma le

atamai o le Atua,lea ua iai le mafaufau lelei i ai tatou ina ia faaaogaina tatau e iloa ona ava ma mata'u ai ia te IA.O le silafaga ati a le Atua e o'o lava i loto ma agaga o tagata.E iloa le Atua i lona malosi,e iloa i lona poto,ae sili atu ona lauiloa o IA i lona ALOFA,auā o le Atua o le Alofa lava IA.Fai mai Ioane,o le Alofa o le Atua,e faapea lava ona fai.O lona atalii e toatasi ua foa'i mo le lalolagi.O le uiga faale-lagi lea o le Alofa,ua Alofa mai ai le Atua i le lalolagi.A uluulumatāfolau le Alofa faale-lagi i loto o lana fanau,e lepetia ma soloia pa malolosi,o loo fale-apitaga i ai lo tatou faauigaina faalelalolagi o le Alofa.E maofa le vaai,e logologoā le faalogo i le maoa'e o mea na IA fai auā e le mafaia ese tasi ona fai o ia mea se'i vaganā ua auai le Atua.Le ala lea o le tele o fesili a Nikotemo.Le Alii e,e faapefea ona fai? Ae mafai? Fai mai Iesu,aua e te ofo! Ae faapefea le te'i a Isaia ina ua fetalai le Atua,o lē ua agasala,fo'i mai,auā oute matuā fa'amagaloina.O le Alofa o le Atua e faapea lava ona fai,ina ia lē fano se tasi e faatuatua ia te IA. E lē tu'ufauina e le alofa o le Atua le leaga e tafili saunoa i le olaga o le tagata.Ua IA finagalo malie na te tauave o tigā uma,ina ia lē tofatumoanaina lo tatou faatuatua a ia maua le Alofa faale-lagi ua IA foa'i mai.O le Faatuatua,o lo tatou talitonu i mea ua lē vaaia e ala i le loto ua mautinoa.Le mautinoa o loo outou afutoto ai e tautua le Galuega tasi pē a le Atua.O le mautinoa e mafua ai ona ofo lo outou soifua ma le talitonu atoatoa,e pei ona fetalai Iesu,Ai sē e faamaumau lona ola ona o A'u ma le talalelei,e toe maua mai. Faatuatua ile Alofa ole Atua,tatou te saogalemu ai i Lana ta'ita'iga mana i lenei tausaga.

**Tatalo Faafetai:** Faafetai ona o loo molimauiina le tumau o Ōu tagata lolotu ile Upu Moni e mafua ona ole loto ua mautinoa i mea e le'o vaaia.Tatou fa'afetai i le Atua,ona o ala o ana fa'amanuiaga i o tatou tagata fa'atauva'a.Tatou fa'afetai, auā e ui i lo tatou fa'atamala i o tatou tiute ma faiva ae maise o le ola mafuta i lana Afio,ae ua tumau pea Lona fa'amaoni ma lona tausai mai. Fa'afetai i le Atua ona o le to'amalie ma le saogalemū o Samoa faapea atunu'u e mamao o aumau ai le to'atele o matua,fanau ma aiga.E ui o lo'o feagai le lautele o le lalolagi ma le tele o fa'afitauli,o taua,o mala faale natura ae o loo malu tapua'aoina pea lo tatou atunu'u mai ia faigatā.Fa'afetai i le Atua ona o lona finagalo faapalepale ma le Alofa fa'amaoni iō tatou tagata i soo se tofi ua vala'auina ai.

**Tatalo Faatoesega:** Tatou fa'ato'ese i le Atua ona o lo tatou le manatua o lana Afio i le tele o taimi o lo tatou ola. Tatou fa'atoesa i le Atua ona ua fa'asili pea lo tatou fa'amoemoe i lo tatou iloa ma le malosi ma o tatou tulaga,e faia ai fa'ai'uga ma lo tatou ola i lana galuega.Fa'atoesa i le Atua ona o le fese'eta'i o lo tatou fa'atuatuga pe a feagai ma fa'afitauli,a'o lo'o vala'au pea ma fia mafuta mai. Fa'ato'ese ona o lo tatou manatu māmā i mea uma ua fa'alia ai Lou Alofa Tunoa,ua matou lē anaana e faia au feau lelei ae ua tausuai ile auaunaga ma ua maua ile ola fia tau ma sui.

**Tatalo Manaoga:** Tatou tatalo ia alofagia e le Atua la tatou faigamalaga umi o lenei Tasaga fou, ia fale tautai lona alofa i o tatou fa'amoemoe uma, ma ia fa'amanuia i le atunu'u ae maise le fe'au tala'i a le Ekalesia.Ia tatou tatalo ia alofagia e le Atua le atiinaa'e o aiga ae maise nai fanau i a latou a'oa'oga,ina ia maua manuia ua tapena e le Atua,ma saga tupu tele ai le fiafia o ona tagata e fa'amoemoe ma fa'alagolago atu ia te IA.Ia tatou talosia le Ekalesia ma lana galuega faa-misionare i tafa uma ole lalolagi,alofagia ē ua matelaina i le fia a'ai,o fanau ua matuaoti ma ua leai ni mea e nonofo ai,alofagia Tinā ua oti a latou tane ma ua maliliu nai fanau ona ole ola lē pulea o nisi,ia o'o i ai Au fa'amanuiaga ma Lou mana lavea'i.

## **ASO 4 IANUARI 2024: ASO TOFI**

**Tusi Paia:Kenese 3:1-13; Mareko14:32-36**

**Matua: Kenese 3:11b “Ua e ‘ai ea i le laau na ou fai atu ai ia te oe,e aua e te ‘ai ai?”**

**Autū: la faamaoni i lou Ola Valaauina**

E lua lava mea e logologoā ai tala o le faatoaga i Etena. (i) O le ulua’i fa’atoaga i le lalolagi..(ii) Logologoā ona o le agasala matuiā na faia e le ulua’i tagata.O le ā lea agasala?O le lē Faamaoni.O le molimau a le Kenese,E lē itiiti le faamoemoe o le Atua na afua ai ona faia le tagata.Fai le ao ma le po,fai le masina ma fetu,fai laau ma manu,ae ina ua faia loa le tagata,ua silasila atu le Atua ua lelei.O Lona finagalo tutasi fo’i lea ua atoatoa ma sologa lelei mea uma ua faia le tagata.Ua tu’u atoa lona faatuatua i le tagata,e pei lava ona molimau le Tusi Paia,“Ua tuuina atu foi i le tagata e pule i mea uma”.Le ala lea o le fai mai o le Fai Salamo,O ia o le palealii o mea uma.Silasila i le telē o le amanaia ma le faatuatua o le Atua na ave i le ulua’i tagata,ae ua ese mamao le mea ua tula’i mai.O le agasala,o le lē faamaoni.Lea ua uma ona osi feagaiga ma le Atua,“Fai mai e taga laau uma,se’i vaganā le laau e tasi,o le laau e iloa ai le lelei ma le leaga.”A’o le tala ua tatou iloa,ua lē faamaoni Atamu ma Eva.Ua lē malilie i nei mea e tele ua pule ai,ae ua toe mana’o foi i le laau e tasi ua tu’u mo le Atua.”

E tele a’oa’oga mo i tatou lenei tala.(i) Soo se tofiga ua tuuina mai e le Atua,telē pe laitiiti,ua tuuina mai faatasi ma le faamanuiaga a le Atua ae maua pe a fai e faamaoni.E le’i taumateina le manuia o Atamu ma Eva.Sa ola filemū,ua tapena ma saunia mea e tele mo i laua ile faatoaga.Ua faaletonu lava,ua ai ma le afu ina ua lē faamaoni.E faapena foi i tatou,e maua faamanuiaga pea fai e faamaoni.(ii) Ia tatou faaeteete i le agasala o le faatamala e tupu pea i ai tatou,e o faatasi ma le lē faamaoni.E le’i manatu mamafa Eva ailoga e afāina si nei tofo e tasi,ua avatu ia Atamu ma taliaina.O taimi ua nona ai le usita’i ma le faalogo o Eva ma Atamu o taimi ia na tauaso ai o la’ua mata e molimauina le Mamalu silisiliese ole Atua.E matagā ma faalumalumaina le i’uga o le lē faamaoni.Ua fia tagata iloga aemaise o tupu o le lalolagi,ma ta’ita’i o atunuu ua to’ilalo ona ole fili lenei? Ae to’afia le aufaigaluega a le Atua ua talai ofu tau i le malosi o le faaosoosoga leaga? Silasila ia Atamu ma Eva ma le maualuga o le mea sa iai,ma le to’ilalo matagā na o’o iai?Tuliloa le faatoaga i Ketesemane.Le tama na valoia na te tu’imomomo le ulu o le gata,lea foi na tolotolo ane e faaosooso le Alii o Iesu.Faafofoga i le upu a Iesu,aua le faia lo’u loto a’o lou finagalo.Le Finagalo na lē faamaoni iai Atamu ma Eva,ae na manumalō a’ia’i ai lo tatou Alii.Le Ekalesia pele,o le itūaso lava ta te tuua ai le Alii,feagai loa i ta’ua ma puapuagā.

**Tatalo Faafetai:** Faafetai e iai itūaso tatou te fetai’i ma faigatā ,a’o lo’o e lavea’i ma ta’imua mai.Fa’afetai i Lau Tusi Paia ole Tusi aogā tele ia matou su’esu’e iai oloo faamatala ai Lou fa’amaoni,ole amiotonu ma le fa’amasinoga.Amuia le tagata e fa’alogologo ma faitau i Lau Upu,E tausi i Ōu ala.E usita’i i mea e a’oa’o atu ina ia popoto ai,matou te lē te’ena fo’i auā e mātāala i Ōu puipui i lea aso ma lea aso.Faafetai ona o auala saunia lelei ma le filemū e ta’ita’iina ai i tatou i aso uma.Faafetai i ala o le alofa e tausi ai e matua fanau,ala ole utaga

loloto i pulega a nu'u ma itumalō,ala matagofie ole Alii e ta'ita'i ai lea aulotu ma lea aulotu.O Lou finagalo ina ia ta'ita'i faamaoni i ala ole fealofani ma le faamagalo.Ia fusia i ala ole loto maulalo ua faasino mai e Iesu,o IA lava ole Ala,le Upu moni ma le Ola.

**Tatalo Faatoesega:** Le Atua e,e moni ua to'ilalo Satani ma ana 'au e fano lava e fa'avavau.Tau ina ia matou tala'i ma fa'asalalau le talalelei o Lou malō ia ola ai.Faatoesa ona ole lē saunia lelei o matou loto e ifo ia te 'Oe na te aumaia ia tofi i tatou ma le loto fou e mafaufau atili i Lou agalelei.Faatoesa ina ia tineia ā matou amio e lē tusa ma Lau silasila oloo faia palapalā lau galuega Paia.Le Tamā e,Ua E silafia mea e tele ua matou vaivai ai.Tatalo fa'atoesa ua māmāu Lou alofa iai matou ae ua matou lē saili atu ma le fa'amaoni.Ua lē mamafi iai matou Lou maliu tigā.E ui ina matou agasala ma sesē a'o loo e saili mai pea 'aia ne'i o matou pa'uū i le leaga.Tatalo ina ia vave ona matou salamō ma manatua Lou toto aogā.E vālea i matou,a'o Lou a'oa'i mai ia matou taofi tonu ai i Upu lelei.O Lau Afio e Ōu le ola,le mana ma le malosi uma lava.Le Tamā e,ua E fa'ailoa mai le Fa'aolataga iai matou ma le lalolagi atoa ina ia fa'amagaloina a matou agasala.

**Tatalo Manaoga:** Le Alii e,Le Atua e te saunia ia avea i matou ma Āu tautua fa'amao'i. Fa'afofoga alofa maia o Lou lava Agaga Sa matou te malolosi ai,matou te manumalō ai,matou te olioli ai.Tatalo e te fa'afouina pea i matou,ina ia o ese mai ile fa'atamala ma le fa'apaiē.Ia fai i matou ma auauna lelei,ia maua le galulue malosi,tauivi ma fa'alagolago i Lou auai mai.Tatalo ina ia faatumuina i tatou le loto fou.Ia tatou fautua mo le manuia o tagata uma ae lē ole manatu fa'apito.E tele peau lagavale o i luma, e āsa ala faigatā,tele puapuagā ma fa'alavelave faafuase'i o loo fotua'i mai a'o Lau Afio e te fetalai ona malū lava lea.

## **ASO 5 IANUARI 2024: ASO FARAILE**

**Tusi Paia:Ioane 21:4-14**

**Matua:Ioane 21:9-10 Ua latou tuta,ona iloa lea o le afi malala,o le i'a foi ua tunu ai ma le areto. Ua fetalai atu Iesu ia te'i latou "Aumaia nisi i'a ua outou maua nei."**

**Autū: O le Fa'atonuga e sau ma le Fa'amanuia**

Ua a'e le faiva o Peteru ma le auso'o,ae faa feiloa'i i le fesili mai o le Alii: Pe ua maua ni i'a? Fai mai le tusi tala a Ioane,e ui o le tautai poto Peteru i le tuloto o Kalilaia,ae ao le po e leai se i'a. Fetalai Iesu,lafo i matau le uega.Ana le seanoa le fa'atonuga a le Alii Toetu,e 'asa lava e a'e fua le faiva.A'o le uiga lea o le faiva faa-soo i le tuloto,a aunoa ma le Alii,e maumau le malosi ae na'o le pupula vale i le po atoa,ae ina ua fetalai le Alii ona tele ai lea ma faula'i i'a na maua.O le isi itu taūa o lenei faiva,o le tuta atu o le vaa,o loo faatali faiva le Alii Toetu.Soo se faiva poo se fagotaga e alu,o se mea faafiafia loto,le a'e mai,o faatali lelei atu,malō tautai a'e!! A'o le faiva lenei a Peteru ma le ausoo,o Iesu lava le faatali faiva.O le afi malala,o le i'a ua tunu,ma le potoi areto.Ua vela ona tago lea o Iesu i le areto ma faasoa atu,se'i tali ai le galala ma le pisi samia ua alu le po o fagogota. Ioe,o le ata lea o la ta faiva faasoo a le Alii,o le ata foi lea o la ta auaunaga i le galuega a le Alii.O le galuega e faigatā,ae a'e mai i le sauni mai o le Alii e talisua ma i tatou. O lana lea faamalō ma lana faafetai,e faafetaia ai lou gapatia i le galuega,a'e mai i le Talisuga ua tapena e le Alii.O lea ua tuta le tatou malaga amata i le Aso 5 o lenei tausaga fou,o loo faatali atu pea le Alii toetu.Tatou onosa'i i le tatou faigamalaga o lenei tausaga fou.E tele faafitauli ma lu'itau o le galuega a le Atua.Fai mai Iesu,aia le fa'atulituli le fa'alogi i le fa'atonuga,toa lafo pea le uega,'aia le fiugofie e



lafo,ae tu'u atoa iai le loto ma le malosi auā o loo tele pea i'a i le tuloto.E ala ona lē maua,ona o loo lafo le upega ma le faamoemoe i lou lava atamai,Leai, tatala lelei le faalogo i le fa'atonuga a le Ali'i Toetū.

**Tatalo Faafetai:** Le Atua,e lē ma fa'amatalatalaina,Lou silisili ese e muta lava le iloa fa'aletagata.Faafetai ile alofa o Iesu e faatupu le loto fiafia e una'i o matou mafaufau i Āna feau lelei ma Ōu ala matagofie.Faafetai i Lou fa'amalolōina o matou ma'i atoa uma,E te fa'aolaina mai lo matou ola ai le tu'ugamau.Fa'afetai o loo manuia le Ekalesia aoao i ona aiga uma,o aiga lata mai ma e mamao atu ile vasa.E māofa i Lou agalelei tele,E mata'utia Lau Afio i mea e fa'avaai ma fa'alogo iai.Fa'afetai ile Tusi Paia,O Lau Upu ole fua e lē ma sesē,e a'oa'i e faatonu ma fa'apopoto i matou i Lau amiotonu.Fa'afetai sili ona ole toto ole Tama'i mamoe na faamaligiina mo le fa'amagaloina o agasala na ola ile pogisā.Ua molimauina e i latou na va'ava'ai i Lou toe soifua manumalō.Fa'afetai ile galuega a le Agaga Paia olo'o fa'ama'ite le ola i mea uma e tatau ona matou faia,o le Agaga na te faatupu le mautinoa ile savaliga faigatā.

**Tatalo Faatoesega:** Tatalo faamaulalo i Ōu luma ona olo matou ola femoumoua'i i le tausaga ua mavae atu,ua saisaitia ma pologa ai lo matou ola talu le sesē o a matou filifiliga.Faatoesa ona ole ala faamaualuga ma le manatu faapito ua afāina tele ai le ola tapua'i o nisi uso.Le Tamā e,alofa ma fa'amagalo a matou amiolētonu uma ia matou taufai tofu lagona lo matou faatauva'a,e ui ile tele o matou ala leaga a'o lea ua matou aulia le lona lima o aso o le tausaga fou.Ana lē seanoa 'Oe Tamā e leai lava so matou malosi ma se fiafia e maua.E ifo to'ele pea i Lau Afio ina ia fa'apalepale mai Lou alofa tunoa e ui magalo ai o matou sesē uma lava.

**Tatalo Manaoga:** Tatalo ia tatou savavali ile malamalama ole Atua i le tausaga fou ma ia tatou sulua ai i Ōna 'ave malolosi.E ui ina uliuli le pogisā,ae tatou te aga'i pea i luma ma le mautinoa,o Keriso le malamalama o le lalolagi.Le Atua e,ia fa'amanaina e Lou Agaga faiva alofilima a Lau Ekalesia aoao.Tatalo mo le EFKS aoao,le Ta'ita'ifono ma le laulau ole fonotele ma komiti uma ale Ekalesia.Ia foa'i le malolosi ma le tofā tatala o Lou agaga e fa'aoaina ai auā le manuia o tagata lotu.Faamanuia ia Samoa ma lana faigāmalō ia faavae ile Atua fuafuaga uma.Ia fa'apupulaina o matou mata i Lou mata'utia na E faia ile fanau a tagata.O ē fouvale ma loto fa'amaualuga ia to'otuli ma salamō fa'amaoni e fo'i atu ai atoatoa.Alofa ma leoleo mai ilo matou ola ina ia lē mata'u i ē o agaleaga mai.Ia E natia i matou ai taupulepulega ale fili.

## **ASO 6 IANUARI 2024: ASO TOONA'I**

**Tusi Paia:Mataio 5:11-12**

**Matua:Mataio 5:11 "Amuia outou pe a latou upu leaga,ma faasaua ia te outou,ma latou tuuaina pepelo outou i mea leaga uma ona o a'u."**

**Autū: O le Kerisiano faatuatua,e lē muimui pe a sauāina.**

O le taualuga lea o le fa'a-amuia a Iesu.Ua IA fa'amalō atu ai i le kerisiano lē fefe, lē fa'alogologotigā ae o loo tumau pea ma le lē faagae'etia,i le feagai ma le inosia ma le sauāina ona o lana talalelei. E tatau ona faalototeleina i tatou i le mautinoa,sa sauāina nisi perofeta a le Atua,e pei o Elia,Ieremia Tanielu ma isi.E o'o foi i le aposetolo o Paulo,ae tainane lo tatou Alii ma lona Satauro.E le'i mafaia e ia sauaga ona vavao le mana o le Alofa Tunoa o le Atua. O le vavaeeseina o le ulu o Ioane le Papatiso,ua mafua i lona loto tele e

faasa’o atu le sesē ma le agasala inosia a Herota Anetipasa ma Herotia.A manatu foi i le sauāina o ulua’i kerisiano,le fetogia i ma’a,le satauro mamafatū,le lafo i le lua i gutu o manu feai,ma le susunu ola ae tufa i malae mataaga e fai ma molī i le pogisā ae le’i mate ai lava le faatuatua o le Ekalesia.O le toto lava o le au maturo ua masa’a i le eleele,ua totogo a’e ai pea le fatu,ma ola talaulau ai pea lana Ekalesia.Manatua foi ua uma ona fetalai Iesu,“E inosia foi outou e tagata uma ona o lo’u igoa.A’o lē tumau ia te A’u,e o’o i le gataaga,e faaolaina o ia.Ia manuia le Aso 6 lenei o le tausaga fou,ma saunia pea le Ekalesia e molimau ma le lē fefe i le faamata’u mai a le alii o le lalolagi,auā e le’o le oti le upu mulimuli o le Tala Lelei,a’o le Toetū.

**Tatalo Faafetai:** Faafetai mo lenei vaiaso fou i lona taūa e faatino ai ana fuifuilotu.E tū le Pule a le Alii e o’o ile faavavau.O mafaufauga a Lona finagalo e ā le tu ā le tu lava.O lo’o matuā silasila mai Ōu fofoga iē o nonofo ile lalolagi ina ia matou mitamita ai,o ‘Oe na faia le alofa,na faia le amiotonu,na faia le fa’amasinoga.E fa’asilisiliina ai pea ‘Oe pe a manatua Lou Paia.O Lou to’asā ua se emo ole mata lea,a o Lou alofa tunoa ole ola lava lea.Faafetai e tele lava Lou agalelei ua teua e ‘Oe mo ē ua matata’u i Lau Afio,matou faapea ane ua o’o mai le manuia ma le olataga mai le Alii.Faafetai mo le Tusi Paia ua faailoa mai ai le taunu’uga ole tauiviga a le tagata faatuatua,o le afu e lē maligi fua,auā ua saunia e le Atua le tauī mo le auuana e tautua matavela, tautua e lē gutuā,leo tele galuega nai lō upu.Fa’afetai ona ole Alofa Tunoa ole Atua ua sasa’a mai mo le fa’aolaina o le lalolagi agasala.Ia fa’amanūina Lou Suafa ona ole fa’aolataga e ala ile soifua o Keriso.

**Tatalo Faatoesega:** Le Atua fa’amagalo o matou leaga ile fa’atinoga o la matou tautua,ua afāina nisi ona o matou uiga fa’amaualuluga ma le tauimasui.Tatalo fa’atoesē ia avea le maliu o Lou Alo Pele e magalo ai a matou agasala.Le Alii e,lo matou Atua,ia e fesoasoani mai e tusa ma Lou alofa.O ē o ita tele mai ua latou fetu’u mai,a o ‘Oe ete fa’amanuia mai lava,E tutū le fili a ua o’ofu i le masiasi.E te fa’afiafia mai ona saga vivii atu ai lea o matou gutu,o matou laulaufaiva fo’i ia topetope e fa’amanūteleina Lou agalelei faifaipea.Faatoesē ona ua leai se onosa’i ma faapalepale e tu’ualalo ma faufautua e faamalosi’au i tagata lolotu i taimi e lulūina ai le faatuatua ele fili.

**Tatalo Manaoga:** Tatalo ia mamao ma mala a ia aulia manuia aso taupōina o le kalena faa-Kerisiano a Lau Ekalesia.Tatalo ia alofagia le ola ia malolosi ma taufiafia.Ia faamanuia lo tatou ola galulue ai itiiti pe tele e tumau Āu faamanuiaga i Lou finagalo alofa.Faamalolō ina e Lou mana i latou o loo mama’i ma tigāina i totonu o aiga ma falema’i pa’i filemū Ōu lima agalelei e faamalolōina mai mafatiaga.Tatalo i mea o mamafa ile loto ma puapuagā tauave o le tagata lava ia.Ia maua Lou filemū io tatou loto.O le ola tatalo ma le ola lagolago o le tasi ile isi,e maua ai le nonofo lelei ma le fefa’amafanafanaa’i.O le Atua e fesoasoani ia tatou toa’aga ma faamaoni e tatalo i aso uma ona matata’u ai lea ia te ‘Oe.

### **ASO 7 IANUARI 2024: ASO SA**

**Tusi Paia : Tusi Paia:Esoto 3:1-16**

**Matua: Esoto 3:10 “O lenei ina sau ia ou te auina atu oe.Esoto 3:16 Alu ia ma e faapotopoto i toeaina o Isaraelu.”**

**Autū: la fa’aaloogia le mamalu o le Atua**

Po’o le ā tonu le fa’aaloogia o loo taula’i iai lenei manatu? I le Esoto 3:5,o lo’o faapea mai. “Mose aua e te faalatalata mai iinei,talai ou seevae ua sā le mea nei.O upu ia e foliga mai ai,o le fa’aaloogia poo le aga maualalo o loo mana’o iai le Atua,o le āva ma le faaeteete lagona

ole gatete ma le mata'u pe a o'o ina soipoia pe savalia laufanua e afio ai le Atua. Peita'i, a faitau pea ona tatou iloa atili ai lea o le aano moni o le feau. O le a lea? "Ua pologa tagata ua fia faasa'olotoina". Ua ou matua vaai i le puapuaga o le nuu, ua ou faalogo foi i lo latou alaga ona o e pule faasaua i a'i latou. "O lenei inā sau ia oute auina atu oe ia Farao. Alu ia ma e faapotopoto i toeaina o Isaraelu. O le fa'aaloaloga sili o loo finagalo iai le Atua mo Mose, e lē ole talai ese o ona seevae, a'o le alu e talai mai tagata ua pologa ina ia sa'oloto. Lona uiga, o le faaaloaloga sili tatou te faia mo le Atua, o lo tatou auauna ma galulue e laga le to'ilalo ma le nofo pologa o tagata, o e ua saisaitia i soo se noataga o le olaga. Ua valaauina i tatou i le Ekalesia, e faapei o Iesu, e tala'i le sa'olotoga i e ua nofo pologa. Silafia lelei e le Atua, o le galuega e faigatā ma telē, e le gafa-taulimaina e le vaivai faalē tagata o Mose ona amo toatasi. E ao ona faapotopoto le nu'u. E tatau foi i le fanauga a Isaraelu ona nofo sauni e amo lo latou pito laau. O le ala i le sa'olotoga moni, o le Atua, o Mose ma le nuu e galulue faatasi. Aua ne'i galo na mafua ona umi le malaga na alu i Kanana, o le fiu o le Atua ma Mose e tau toso le nuu. Le Ekalesia, ese le ta'ua o le pulupulu lima fa'atasi. Pei lava o upu a Mose, O ai a'u ou te alu atu ai? E faapefea ona ou aumaia le nuu? Tatou faamoemoe o loo soifua "Lē Ola ma Ola Pea", faatasi ai ma le lagolago o lana Ekalesia, mo le faasa'olotoina o agaga e tele ua faapologaina i le malosi o le agasala. Ia faamanuia le Atua i le malaga a le Ekalesia i lenei tausaga fou. Soifua ona o IESU.

**Tatalo Faafetai:** Faafetai ile alofa matalasi ole Atua mo le tausaga fou ma ona faamanuiaga. E lelei ona vivii atu i Lau Afio ma ia tatou fai pesega e tatau ai. Lo'u Agaga e, ia faamanu atu, o mea uma fo'i o i totonu ia te a'u ia faamanu i Lona Suafa Paia. Fa'afetai mo le Tusi Paia o le Talalelei ua fa'amanatu mai ai Lou alofa tunoa e fai ma mapusaga o tagata mafatia. Faafetai le Atua ona ole feau o le Tala lelei na aumaia i Samoa e misionare ma sa taliaina lelei e tuaa ua mavae atu aemaise i tupu ole atunu'u i Samoa. Faafetai ona o le Savali o le Filemu na o mai ai Ioane Viliamu ma le Tala lelei ia Iesu Keriso le Alo o le Atua i Samoa ma le Vasa Pasefika. Faafetai ona ole fatu sa totoina ua tupu ma ua olaola i tafa e fia o le lalolagi.

**Tatalo Faatoeseqa:** Faatoese o le leai o se ola faamagalo i le tele o taimi, ua lē manino ai lo tatou faamoemoe ile soifua faamagalo o le Alii o Iesu Keriso. Ia tumau le ola salamō o le tagata agasala ile Alii manumalo. Po'o le ā le pogisa o tatou mafatia ai, ia tatou la'a atu i le tausaga fou ma taofi mau o Iesu le malamalama o le lalolagi. O Lou alofa ma lou agalelei ua laveaiina ai i matou i mala ma puapuaga. E fai taulaga ma le loto Ōu tagata i le aso o Lou malosi i Āu mea paia.

**Tatalo Manaoga:** Tatalo ia tupu le alofa, ia malosi le alofa ma ia tumau le alofa i lana Ekalesia. Ia matou iloa e fa'asino mai e Iesu le ala, O IA lava o le ala. O le iai o Iesu i totonu o tatou loto, ia tatou mafaufau e pei o IA, galue e pei o IA, ma alofa atu e pei o IA. Fa'aali mai e Iesu le Upu moni tau i le Atua o IA lava ua liutino tagata. Ia iai Lou agaga e fa'aa'upegaina ai i ona itū uma ina ia ta'ita'i ma le alofa ma fa'alagolago Ia fa'amanaina Lau Upu ma le galuega folafola i alalafaga uma o punonou ai Lau 'au faigaluega tofia. Ia faatumulia ile olioli ma le malolosi mai ia te 'Oe. Ia taufai lagona elē malū a'i pea e souā ini taimi le folauga. Ia tatou ave le fa'amuumua i Lau Galuega tasi pē ina ia saili Lou tamāoaiga i le ola faale-agaga e manuia ai le taunu'uga o lenei tausaga. Savavali faatasi ma Iesu o IA e pa'i malū mai i e o loo maua i tino ma'i, o loo mafatia i a'afiaga esese. AMENE

